

『續日本紀』27 天平神護二年六月壬子条

壬子。刑部卿從三位百濟王敬福薨。其先者出自百濟國義慈王。高市岡本宮馭宇天皇御世。義慈王遣其子豐璋王及禪廣王入侍。泊于後岡本朝廷。義慈王兵敗降唐。其臣佐平福信尅復社稷。遠迎豐璋。紹興絕統。豐璋篡基之後。以譖橫殺福信。唐兵聞之復攻州柔。豐璋与我救兵拒之。救軍不利。豐璋駕船遁于高麗。禪廣因不歸國。藤原朝廷賜号曰百濟王。卒贈正廣參。子百濟王昌成。幼年隨父歸朝。先父而卒。飛鳥淨御原御世贈小紫。子郎虞。奈良朝廷從四位下攝津亮。敬福者即其第三子也。放縱不拘。頗好酒色。感神聖武皇帝殊加寵遇。賞賜優厚。時有士庶來告清貧。每假他物。望外与之。由是。頻歷外任。家无餘財。然性了辨。有政事之量。天平年中。仕至從五位上陸奥守。時聖武皇帝造盧舍那銅像。冶鑄云畢。塗金不足。而陸奥國馳驛。貢小田郡所出黄金九百兩。我國家黄金從此始出焉。聖武皇帝甚以嘉尚。授從三位。遷宮內卿。俄加河內守。勝寶四年拜常陸守。遷左大弁。頻歷出雲。讚岐。伊豫等國守。神護初。任刑部卿。薨時年六十九。